




# ხაშურის მოახბე



№31(312)

12 ოქტომბერი, სამშაბათი, 2021 წელი

## შრომამისჯილი პირები ხაშურის მერიის შესაბამის სამსახურებში, სკვერებსა და ბალებში დასაქმდებიან

იუსტიციის სამინისტრომ, არასაპატიმრო სასჯელის ეფექტიანი აღსრულების მიზნით, ახალი მიდგომა დანერგა. შესაბამისი მემორანდუმით რატი ბრეგვაძემ ხაშურის მუნიციპალიტეტის მერიასთან გააფორმა.

იუსტიციის სამინისტროს ახლებური მიდგომის შედეგად, მსჯავრდებულები ერთის მხრივ საკუთარ წვლილს შეიტანენ ქალაქებისა და მუნიციპალიტეტების ინფრასტრუქტურული პროექტების განხორციელებაში, ხოლო მეორეს მხრივ, საზოგადოების წინაშე მიყენებულ ზიანს აანაზღაურებენ.

მიმდინარე წელს, ურთიერთთანამშრომლობის მემორანდუმები უკვე გაფორმდა ქუთაისის, ოზურგეთის, ბათუმის, ყვარლის, გურჯაანის, თელავის, სიღნაღის, ფოთის, ზუგდიდის და ბორჯომის მუნიციპალიტეტების მერიებთან, რის შედეგადაც, შრომამისჯილთა დასაქმებისთვის ახალი სივრცე გაჩნდა.

საზოგადოებისთვის სასარგებლო შრომის ეფექტიანი აღსრულების მიზნით, შესაბამისი მემორანდუმები, ქვეყნის მასშტაბით, ყველა ქალაქთან და მუნიციპალიტეტთან გაფორმდება.



განათლების პროგრამის ფარგლებში, შიდა ქართლის რეგიონის დაწყებითი კლასების კითხვის საუკეთესო მასწავლებლის წოდება გადაეცა. საქართველოს დამსახურებული მასწავლებლის საპატიო წოდება მიენიჭა ხაშურის მეორე საჯარო

## დაჯილდოვდნენ მუნიციპალიტეტის წარმატებული მასწავლებლები

ხაშურის მუნიციპალიტეტის მერის მოვალეობის შემსრულებელმა ზვიად ქურდაძემ, ხაშურის საგანმანათლებლო რესურს ცენტრის ხელმძღვანელმა ზვიად გოგუაძემ, მუნიციპალიტეტის მერიის წარმომადგენლებთან ერთად, მასწავლებლის საერთაშორისო დღესთან დაკავშირებით, მუნიციპალიტეტის წარმატებული მასწავლებლები დააჯილდოვეს.



მერიისგან სიმბოლური საჩუქრები მიიღო სამმა პედაგოგმა, რომელთაც ბოლო სასწავლო წლის განმავლობაში პროფესიულ, შემოქმედებით საქმიანობასა და მომავალი თაობის აღზრდაში განსაკუთრებულ წარმატებებს მიაღწიეს. კერძოდ, ხაშურის პირველი საჯარო სკოლის დირექტორსა და ამავე სკოლის სამოქალაქო განათლების მასწავლებელ მორის დანდურიშვილს საქართველოს განათლებისა და მეცნიერების მინისტრის გადაწყვეტილებით ზოგად განათლებაში განსაკუთრებული დამსახურებისთვის მენტორი მასწავლებლის სტატუსი მიენიჭა; ხაშურის მეშვიდე საჯარო სკოლის პედაგოგ ლიანა მეტივიშვილს, USAID საბაზისო



სკოლის დეაქლმოსილ პედაგოგს - ქართული ენისა და ლიტერატურის მასწავლებელ მაყვალა შუბითიძეს, რომელსაც ტიტულის აღსანიშნავი მედალი და სერტიფიკატი საგანმანათლებლო რესურსცენტრის ხელმძღვანელმა ზვიად გოგუაძემ გადასცა.

მუნიციპალიტეტის მერის მოვალეობის შემსრულებელმა ზვიად ქურდაძემ მიულოცა პედაგოგებს პროფესიული დღე და აღნიშნა, რომ მათი ღვაწლი მომავალი თაობების აღზრდის საქმეში უმნიშვნელოვანესია.

წარმატებული პედაგოგების დაჯილდოების ცერემონია მუნიციპალიტეტში ყოველწლიურად იმართება.

## ხაშურის მუნიციპალიტეტის საჯარო სკოლებში სასწავლო პროცესი კოვიდრეგულაციების სრული დაცვით ხორციელდება

4 ოქტომბერს, სასწავლო პროცესი, მთელი ქვეყნის მასშტაბით, დისტანციური რეჟიმიდან, საკლასო ოთახებში გაგრძელდა. მიზეზი, ისევე ეპიდ. სიტუაცია, რომელმაც ორი წელია, თვდაყირა დააყენა განათლების სისტემა. წელსაც, არსებობდა გარაუდი, რომ შეიძლებოდა, სწავლა, ისევე დისტანციურ რეჟიმ ი წარმართულიყო, თუმცა, განათლების სამინისტრომ სრული მზადყოფნა გამოაცხადა და სწავლაც განსაკუთრებულ პირობებში გაგრძელდა. გამონაკლისი, არც ხაშურის სკოლებია. თუ როგორი მზაობით შეხვდა სასწავლო პროცესის დაწყებას ხაშურის სკოლები, ამაზე, ხაშურის საგანმანათლებლო რესურსცენტრის უფროსი, ზვიად გოგუაძე ისაუბრებს.

–2021 წლის 15 სექტემბრიდან, ქალაქ ხაშურის საგანმანათლებლო რესურსცენტრის სამოქმედო ტერიტორიაზე არსებულ 33 ზოგადსაგანმანათლებლო დაწესებულებაში სასწავლო პროცესი დისტანციურ რეჟიმში დაიწყო, გარდა პირველი კლასისა. 2021 წლის 4 ოქტომბრიდან კი, პირისპირ სწავლების რეჟიმში, საკლასო ოთახებში განახლდა სასწავლო პროცესი I-XII კლასის ყველა მოსწავლისათვის.

სასწავლო პროცესის საკლასო სივრცეში აღდგენამდე, რესურსცენტრის ორგანიზებით, ხაშურის მუნიციპალიტეტის საზოგადოებრივი ჯანდაცვის ცენტრის მიერ განხორციელდა “კორონავირუსით (SARS-CoV-2)

გამოწვეულ ინფექციას (COVID-19) სავალდებულო ტესტირებას დაქვემდებარებულ პრიორიტეტულ პირთა ნუსხისა და ჩატარების წესის დამტკიცების შესახებ” საქართველოს მთავრობის №975 განკარგულებით გათვალისწინებული სავალდებულო ტესტირება საჯარო და კერძო სკოლაში დასაქმებული ყველა პირის მიმართ. აღსანიშნავია, რომ ხაშურის მუნიციპალიტეტში, მასწავლებელთა 86% აცრილია კორონავირუსის საწინააღმდეგო ვაქცინით.



–რა საჭირო ღონისძიებები გატარდა სასწავლო პროცესის უსაფრთხოებისთვის?

(დასასრული II გვერდზე)

# ხაშურის მუნიციპალიტეტის საჯარო სკოლებში სასწავლო პროცესი კოვიდრეგულაციების სრული დაცვით ხორციელდება

(დასასრული)

–2020-2021 სასწავლო წლის დასრულებისთანავე, საქართველოს განათლებისა და მეცნიერების სამინისტრომ დაიწყო მზადება ახალი სასწავლო წლის გამოწვევების საპასუხოდ: სახელმწიფო დაფინანსების ფარგლებში, ხაშურის საგანმანათლებლო რესურსცენტრმა ყველა სკოლას მიაწოდა საჭირო რაოდენობის დისტანციური თერმომეტრები, დეზობარიერები, დეზობარიერიისთვის გასაზავებელი სითხეები, ხელის სადეზინფექციო ხსნარები, სადეზინფექციო ხსნარის დისპანსერები და სხვა საჭირო ინვენტარი.

ორგანიზებულად, სახელმწიფო დაფინანსების ფარგლებში, მოსწავლეების სახელმძღვანელოებით უზრუნველყოფის პროგრამის ფარგლებში, რესურსცენტრმა ყველა სკოლას გადასცა საჭირო რაოდენობის სახელმძღვანელოები და რეგულაციები.

მუნიციპალიტეტის მერიის აქტიური ჩართულობით, 16 საჯარო სკოლაში დაუბრკოლებლად განახლდა მოსწავლეების ტრანსპორტით უზრუნველყოფის პროგრამა.

ყველა ზოგადსაგანმანათლებლო დაწესებულებისთვის, მასწავლებლებისა და მოსწავლეებისთვის გაიწერა პანდემიის პირობებში პრევენცი-



ული ღონისძიებების შესახებ ზოგადი რეკომენდაციები. რეკომენდაციები საკმაოდ მრავალრიცხოვანია, მაგალითისთვის შევხებით რამდენიმე მნიშვნელოვან რეკომენდაციას: სკოლებმა შეიმუშავეს პანდემიის პირობებში საგანგებო სიტუაციაში სამოქმედო გეგმა; თვალსაჩინოდ ადგილას განათავსეს ინფორმაცია COVID-19-ის პრევენციული ღონისძიებების შესახებ; დაწესებულების შესასვლელთან განათავსეს დეზობარიერი, სავალდებულო გამოყენების ნიშნის მითითებით; შესასვლელთან ახორციელებენ თერმოსკრინინგს, რათა გააკონტროლონ მასწავლებლების, მოსწავლეებისა და მათი მშობლების/კანონიერი წარმომადგენლების, თანამშრომელთა და სკოლაში მომსახურების ნებისმიერი ვიზიტორის ჯანმრთელობის მდგომარეობა, ტემპერატურის გაზომვით; თერმოსკრინინგის დროს დაფიქსირებული მაღალი ტემპერატურის ხელმეორედ გადამოწმების მიზნით, სკოლის შესასვლელში უზრუნველყვეს შესაბამისი მოსაცდელი სივრცის მოწყობა; ხელის დეზინფექციისათვის არანაკლებ 70%-იანი ალკოჰოლის შემცველი

ანტისეპტიკური საშუალებების დისპენსერები განათავსეს დაწესებულების შესასვლელში, საერთო სარგებლობის სივრცეებთან (საიზოლაციო ოთახი, ბიბლიოთეკა, სპორტული დარბაზი, სამასწავლებლო, სასადილო და სხვ.), ნებისმიერი პირის შენობაში უშვებენ მხოლოდ პირბადით, დეზობარიერის გავლით, თერმოსკრინინგისა და ხელის ჰიგიენის ჩატარების შემდეგ; ყველა სკოლა უზრუნველყოფილია პირბადეების რეზერვით; სასწავლო ოთახები, ადმინისტრაციული სათავსოები და საერთო სარგებლობის ფართები აღჭურვილია გამოყენებულ ერთჯერადი ხელსახოცებისა თუ სხვა ჰიგიენური ნარჩენებისთვის განკუთვნილი კონტეინერებით (დახურული კონტეინერებით, სატერფულით გახსნის შესაძლებლობით), რომლებშიც ჩაფენილია ერთჯერადი პოლიეთილენის პარკი. სანიტარიული წერტილების ი დასუფთავება ხდება ყოველი დასვენების შემდეგ;

აღსანიშნავია, რომ სკოლაში შემსვლელი ნებისმიერი პირი, მათ შორის I-XII კლასის მოსწავლეები ვალდებული არიან, რომ ატარონ პირბადე. პირბადის ტარების ვალდებულებისგან თავისუფლდება ის მოსწავლე, რომელსაც აქვს პირბადის ტარებისგან გასათავისუფლებად სათანადო სამედიცინო ჩვენება. ასევე, ის სპეციალური საგანმანათლებლო საჭიროების ან შეზღუდული შესაძლებლობის მქონე მოსწავლე, რომელიც კანონიერი წარმომადგენლის მოთხოვნის საფუძველზე სკოლის დირექტორის ინდივიდუალური ადმინისტრაციულ-სამართლებრივი აქტის საფუძველზე გათავისუფლებულია პირბადის ტარების ვალდებულებისგან.

- რაც შეეხება მოსწავლეებს, მათზე რა ვალდებულებები მოქმედებს?

განისაზღვრა მოსწავლის ვალდებულებებიც: დაიცვან ჰიგიენის წესები; დაიცვან სასწავლო დაწესებულების მიერ დადგენილი წესები; დაიშუშავონ ხელები სადეზინფექციო ხსნარით იმ შემთხვევაში, როცა ვერ ხერხდება ხელების დაბანა თხევადი საპნით და ერთჯერადი ხელსახოცით გამოიწმინდოს; დაიბანონ ხელები წყლითა და საპნით ხილული დაბინძურების შემთხვევაში ან ბიოლოგიური სითხეების მოხვედრისას; დახვედებისა და დაცემინების დროს მიიფარონ სუფთა ხელსახოცი (რომელიც, ერთჯერადი გამოყენების შემდეგ, ექვემდებარება გადაგდებას) ან მოხრილი იდაყვი; მოერიდონ ხელებით თვალებზე, ცხვირზე და პირზე შეხებას; სწავლების პერიოდში უზრუნველყონ თმის შეკვრა/მკიდროდ დამაგრება, რათა მაქსიმალურად შეიზღუდოს თმების სახის ზედაპირთან შეხება; არ გამოიყენონ სხვისი ნივთები; ჯანმრთელობის მდგომარეობის გაუარესების შემთხვევაში მიმართონ ექიმს;

განისაზღვრა მშობლის/კანონიერი წარმომადგენლის ვალდებულებები: ცხელების/რესპირატორული დაავადების შემთხვევაში არ გაუშვან მოსწავლე სკოლაში; მოსწავლე უზრუნველყონ პირბადით; სკოლაში ყოფნის პერიოდში ცხელების/რესპირატორული დაავადების სიმპტომების გამოვლენის შემთხვევაში დროულად გაიყვანონ მოსწავლე სკოლიდან და უზრუნველყონ ბავშვის მიმართვა ოჯახის/სოფლის ექიმთან, ან დაუკავშირდით 112-ს შესაბამისი სამედიცინო მომსახურების მისაღებად; სახლის პირობებში, ჯანმრთელობის მდგომარეობის გაუარესების შემთხვევაში, შეატყობინონ კლასის დამრიგებელს; სახლის პირობებში ცხელების ან სხვა რესპირატორული დაავადების სიმპტომების გამოვლენისას უზრუნველყონ ბავშვის მიმართვა ოჯახის/სოფლის ექიმთან, ან დაუკავშირდნენ 112-ს შესაბამისი სამედიცინო მომსახურების მისაღებად.

სასწავლო პროცესის უსაფრთხოდ მართვის უზრუნველსაყოფად სამართლებრივი აქტით განისაზღვრა სამინისტროსა და რესურსცენტრის ფუნქციები. კერძოდ, საზოგადოებრივი ჯანდაცვის რეკომენდაციის შესაბამისად, მინისტრის ბრძანებით, შესაძლებელია სკოლა გადავიდეს სრულად ელექტრონული სწავლების რეჟიმზე, ხოლო ლოკალური ინფიცირებების შემთხვევებში საგანმანათლებლო რესურსცენტრის უფროსის ბრძანებით, კლასი/კლასები შეიძლება გადავიდნენ დისტანციური სწავლების რეჟიმზე და სკოლამ სასწავლო პროცესი წარმართოს ჰიბრიდული სწავლების რეჟიმით. ამ ეტაპზე ხაშურის მუნიციპალიტეტში, არცერთი სკოლა არ არის სრულად ელ.სწავლების რეჟიმზე, ხოლო ჰიბრიდული სწავლების მოდელი გამოიყენება სამ საჯარო სკოლაში.

თ. ჯავახიშვილი

# ხაშურის მუნიციპალიტეტის სოფელ ფდევში, უახლოეს პერიოდში, ჭიდაობის სექცია ამოქმედდება

სექციის აღსაზრდელებმა - მომავალმა სპორტსმენებმა დღეს ძიუდოს ეროვნული ფედერაციისა და ქართული ჭიდაობის ეროვნული ფედერაციისგან საჩუქრად ჭიდაობისთვის საჭირო ეკიპირება მიიღეს,



ხაშურის მუნიციპალიტეტმა კი სექციას ტატამი გადასცა, რომელიც ბავშვებმა იმ დღესვე თვითონ დაამონტაჟეს. გარდა ამისა, საფეხბურთო კლუბ „საბურთალოსგან“ ფლეველ ახალგაზრდებს ფეხბურთის ბურთებიც გადაეცათ.

სოფელში სტუმრად იმყოფებოდნენ და საჩუქრები პირადად ჩაიტანეს საქართველოს პარლამენტის წევრმა, ქარელისა და ხაშურის მაჟორიტარმა დეპუტატმა ზაალ დუგლაძემ, 2016-2020 წლების მოწვევის საქართველოს პარლამენტის წევრმა სიმონ ნოზაძემ, ხაშურის მუნიცი-

პალიტეტის მერის მოვალეობის შემსრულებელმა ზვიად ქურდაძემ, საქართველოს ძიუდოს ეროვნული ფედერაციის პრეზიდენტმა გიორგი ათაბეგიშვილმა, ხაშურის მუნიციპალიტეტის საკრებულოს თავმჯდომარის მოადგილე ზურაბ ნოზაძემ, მუნიციპალიტეტის მერიის განათლების კულტურისა და სპორტის სამსახურის, სასპორტო სკოლის წარმომადგენლებმა. აღსანიშნავია, რომ ძიუდოს ეროვნული ფედერაციის პრეზიდენტმა სექციის მწვრთნელებს სამწვრთნელო ლიცენზიები პირადად გადასცა.

სტუმრები გაეცნენ სოფლის ახალი თაობის წარმომადგენლებს, ხაზი გაუსვეს ჯანსაღი ცხოვრების წესის მნიშვნელობას და მომავალ სპორტსმენებს სამომავლო თანადგომა აღუთქვეს.

ჭიდაობის სექცია ბინას დაიდებს სოფელ ფდევის საჯარო სკოლის დარბაზში, რომელიც ყველა თანამედროვე სტანდარტის მიხედვითაა აგებული.





**(გაგრძელება. დასაწყისი იხ. „ბმ“ #21,22,23,25)**

სოფელ იტრიაში წინა აღწერით თავად სეხნია ჩხეიძის,ახლა კი მისი შვილიშვილის ყარამან ჩხეიძის კუთვნილი გლეხი

1. გოგია გონცაძე,მისი ცოლი,ქალიშვილები,ძმა მიხეილი,მათი დედა. ამ შვიდსულიან ოჯახს აქვს სახლი, ხნავს სამდღიურ საბატონო მიწას, იღებს 30 კოდ პურს, რქოსანი პირუტყვი სამი სული, ხვან-თესვითა და სხვა სამუშაოებით იღებენ სარჩოს.

თავად ივანე ქაიხოსროს ძე აბაშიძის გლეხი, რომელიც არ იყო ნაწევრები

წინა აღწერით

1. გოგია კიკნაძე,მისი დედა. ამ ორსულიან ოჯახს აქვს სახლი. დღიური მუშაობით იღებს სარჩოს.

შენიშვნა: 1. თავად ჩხეიძეების კუთვნილი ვარგისი მიწები, რომლებშიც არ არის ნაწევრები იტრიის ეკლესიის კუთვნილი ვარგისი ოცდღიური, მწი-რი-ცხრადღიური, ტყე 800დღიური, ყოველივე ამას აქვს სახლურები, არის ერთი წისქვილი, რომელიც ეკუთვნის ყველა მცხოვრებს, მცხოვრებთა ძირითადი საქმიანობაა მიწათმოქმედება და სხვა სამუშაოები.

2. წინა აღწერით ნაწევრები იყო ამ სოფელში მხოლოდ 4 კომლი საბატონო გლეხი, ზოგიერთი მათგანი იხდიდა სურსათს თავად ჩხეიძეების გლეხების რიცხვში, ახლა კი ჭირისაგან გარდაცვლილებისა და სხვაგან გადასახლებულების გარდა, იმყოფება 2 კომლი საბატონო გლეხი, მათგან გადასახადის გადახდა შეუძლია: თავად ყარამან ჩხეიძის 1 კომლს - ხორბალი 3 კოდი, ქერი 2 კოდი, თავად ივანე აბაშიძის 1 კომლს - ხორბალი 3 კოდი, ქერი 2 კოდი, თავად ივანე აბაშიძის 1 კომლს უქონლობის გამო გამოსადეგის გადახდა არ შეუძლია.

სოფელი ურთხვა - აზნაურ დავით აბაზაძის გლეხები:

1. ბერუა ბლიაძე, მისი ცოლი, ვაჟები: გაბრიელი, სიმონი, დავითი და გრიგოლი.

ამ ექვსსულიან ოჯახს აქვს სახლი, ხუთდღიური სახნავი საბატონო მიწა, იღებს 50 კოდ პურს, რქოსანი პირუტყვი 6 სული. ხვან-თესვითა და სხვა სამუშაოებით იღებს სარჩოს.

2. გლახა არსენაძე, ქვრივი, ძმისწულები: ივანე და გიორგი, მისი შვილიშვილი პავლე. ამ ოთხსულიან ოჯახს აქვს სახლი, ექვსდღიური სახნავი საბატონო მიწა. იღებს 40 კოდ პურს, რქოსანი პირუტყვი 2 სული, ხვან-თესვითა და სხვა სამუშაოებით იღებს სარჩოს.

3. ზაქარია ბითაძე, მისი ცოლი და ქალიშვილები, მასთან ერთ ოჯახში მისი ძმები: გაბრიელი და ნინია, მათი ცოლები, ნინიას ვაჟი გიორგი ამ რვასულიან ოჯახს აქვს სახლი, რვადღიური საბატონო მიწა, იღებს 60 კოდ პურს, რქოსანი პირუტყვი 5 სული, ხვან-თესვითა და სხვა სამუშაოებით იღებს სარჩოს.

შენიშვნა 1. სოფელი გაშენებულია მდინარე სურამულაზე, წყალი საკმარისია, ვარგისი მიწა 50 დღიური, მწირი-35დღიური, ტყე 140(170?) დღიური. მთავარი აგარაკები ეკუთვნის აზნაურ აბაზაძეებს, სხვა საგარეულები არ არის, არის 1 წისქვილი, მცხოვრებთა ძირითადი საქმიანობაა ხვან-თესვა.

ეს გლეხები ადრე სურსათს იხდიდნენ აზნაურ აბაზაძეების გლეხების რიცხვში, ახლა კი გადახდა შეუძლია სამი კომლს - ხორბალი 9 კოდი, ქერი 6 კოდი.

სოფელ ბეკამში თავად ვეგენი აბაშიძის ყოფილი გლეხები, ახლა კი ეკუთვნიან თავად ივანე ქაიხოსროს ძე აბაშიძეს და ქ-ნ სალომეს

1. აზნაური გლახა ყიფიანი, მისი ცოლი, ვაჟი რევაზი, 2 ქალიშვილი, რევაზის დედა.

ამ ექვსსულიან ოჯახს აქვს სახლი, ოცდღიური საბატონო მიწა, საიდანაც ხნავს ათდღიურს, იღებს 20 კოდ პურს, ერთდღიური სავენახე ადგილი, რქოსანი პირუტყვი 15 სული, 2 ცხენი, 30 თხა, ხვან-თესვითა და სხვა სამუშაოებით იღებს სარჩოს.

2. აზნაური პაპუა ორჯონიკიძე, მისი ცოლი, ვაჟები: გრიგოლი და ზაქარია, ძმისწული ნინია, მას ყავს და.

ამ ექვსსულიან ოჯახს აქვს სახლი, აქვს საგვარეულო მიწა 100(?) დღიური, ოცდღიურის ხვით იღებს 240 კოდ ხორბალს, ვენახი ორდღიური სახნავი, აქედან იღებს 25 კოკა ღვინოს, პირუტყვი 16 სული, 2 ცხენი, 1 წისქვილი, საიდანაც იღებს 10 კოდ ხორბალს, ხვან-თესვითა და სხვა სამუშაოებით აქვს საკმარისი სარჩო(ციფრებში გარკვეული შეუსაბამობაა -დ.ხ.)

1. ბერუა კიკნაძე, მისი ცოლი, ქალიშვილი, მასთან ერთ ოჯახში მისი ძმები: პეტრე,(ქვრივი), და ზურაბი, ზურაბს ყავს ცოლი და ქალიშვილი, პეტრეს ყავს ქალიშვილი, მათი ბიძა ხიზანა, მისი ცოლი, ვაჟი ილარიონი, ბიძაშვილები: სოსია, დავითი, ანდრო, გოგია და ნინია, სოსიას ცოლი, ვაჟი გიორგი, დავითის ცოლი, გოგისა ყავს ცოლი და ქალიშვილი, მას ჰყავს ვაჟი გიორგი.

ამ 22 სულიან ოჯახს აქვს სახლი, აქვს ნასყიდი ექვსდღიური მიწა, საბატონო 14 დღიური, რომლის ხვითაც იღებს 240 კოდ პურს, დღე-ნახევარი სახნავი ვენახი, საიდანაც იღებს 15 კოკა ღვინოს, რქოსანი პირუტყვი 16 სული, 1 ცხენი, 1 ბორბალი წისქვილი, რომელსაც მოაქვს 10 კოდი შემოსავალი, ხვან-თესვითა და სხვა განწესებით აქვს საკმარისი წლიური სარჩო.

4. დათია გოგალაძე, მისი ცოლი, მასთან ერთ ოჯახში ძმები: მიხეილი, გიორგი და პეტრე, მათი ცოლები, მიხეილის ვაჟები: ანდრო, სოსია, ნინია, გიორგი და გაბრიელი, ქალიშვილი.

ამ 14სულიან ოჯახს აქვს სახლი, იღებს 160 კოდ პურს, ერთდღიური სახნავი ბაღიდან იღებს 6 კოკა ღვინოს, რქოსანი პირუტყვი 11 სული, 1 ცხენი, 3 სკა ფუტკარი, ხვან-თესვითა და სხვა განწესებით აქვს საკმარისი ქონება.

5. პაპუნა გოგალაძე, მისი ცოლი, ვაჟები: სიმონი, თევდორე, მასთან ერთ ოჯახში მისი ძმა ზურაბი, ძმისწული ბეჟანი, მისი დედა.

ამ 7 სულიან ოჯახს აქვს სახლი, ხუთდღიური საბატონო მიწა, იღებს 40 კოდ პურს, ნახევარდღიური სახნავი ვენახიდან იღებს 5 კოკა ღვინოს, ყავს 6 სული რქოსანი პირუტყვი. ხვან - თესვითა და სხვა სამუშაოებით იღებს სარჩოს.

6. ნინია გაბრიელაშვილი, მისი ცოლი, ვაჟები: პეტრე და გოგია, ქალიშვილი. ამ ხუთსულიან ოჯახს აქვს სახლი, ექვსდღიური საგვარეულო მიწა, სამდღიურის ხვით იღებს 30 კოდ პურს, დღიური სახნავი ვენახიდან იღებს 10 კოკა ღვინოს, ხვან-თესვითა და სხვა სამუშაოებით იღებს სარჩოს.

7. შოთ გუდაძე, მისი ცოლი, ვაჟი ივანე, მისი ცოლი.

ამ ოთხსულიან ოჯახს აქვს სახლი, ხნავს სხვის სამდღიურ მიწას დალაზე, იღებს 30 კოდ პურს, ნახევარდღიური სახნავი ბაღიდან იღებს 3 კოკა ღვინოს, რქოსანი პირუტყვი 6 სული, ხვან-თესვით იღებს სარჩოს.

8. გოგია ლომუაშვილი, მისი ცოლი, ვაჟები: სოსია და ივანე, მასთან ერთ ოჯახში მისი ძმა ზაქარია, მისი ცოლი, ვაჟები: სიმონი და ანდრო

ამ რვასულიან ოჯახს აქვს სახლი, საგვარეულო ოთხდღიური მიწა, იღებს 50კოდ პურს, ნახევარდღიური ვენახიდან იღებს 3 კოკა ღვინოს,

რქოსანი პირუტყვი 6 სული, ხვან-თესვითა და სხვა სამუშაოებით იღებს სარჩოს.

9. თევდორე ღამბაშიძე, მისი ცოლი, ვაჟები: სოსია და ივანე, ქალიშვილი, მასთან ერთ ოჯახად ბიძაშვილები: გიორგი, სიმონი და სოსია, სიმონის ცოლი, ქალიშვილი, სოსიას ცოლი და ქალიშვილი.

ამ 12 სულიან ოჯახს აქვს სახლი, ხნავს ექვსდღიურ საბატონო მიწას, იღებს 60 კოდ პურს, რქოსანი პირუტყვი 6 სული. ხვან-თესვითა და სხვა სამუშაოებით იღებს სარჩოს.

10. პეტრე ბარბაქაძე, მისი ცოლი, ვაჟი გაბრიელი, ქალიშვილი, მასთან ერთ ოჯახში მისი ძმები: სიმონი, ლუკა და თევდორე, ლუკას ცოლი, ნინიას ცოლი და ქალიშვილი, ვაჟი იასე.

ამ 11სულიან ოჯახს აქვს სახლი, ათდღიური საგვარეულო მიწა, ხვან-თესვით იღებს 120 კოდ პურს, ნახევარდღიური ვენახიდან იღებს 5 კოკა ღვინოს, რქოსანი პირუტყვი 10 სული, 2 სკა ფუტკარი, ხვან-თესვითა და სხვა სამუშაოებით აქვთ საკმაო სარჩო.

11. გოგია მჭედლიშვილი, მისი ცოლი, ქალიშვილი, მასთან ერთ ოჯახში მისი ძმები: მიხეილი და მამუკა, მიხეილის ბიძაშვილი ანდრო

ამ შვიდსულიან ოჯახს აქვს სახლი, ექვსდღიური საბატონო მიწა, ხნავს სამდღიურს, იღებს 30 კოდ პურს, რქოსანი პირუტყვი 3 სული, ხვან-თესვითა და სხვა სამუშაოებით იღებს სარჩოს.

12. გიგოლა ფოცხვერაშვილი, მისი ცოლი, 2 ქალიშვილი, მასთან ერთ ოჯახში მისი ძმა სიმონი.

ამ ხუთსულიან ოჯახს აქვს სახლი, რქოსანი პირუტყვი 1 სული, საქონლის მწვემსობით ირჩენს თავს.

13. ბერო ლაცაბიძე, მისი ცოლი, ქალიშვილი, მასთან ერთ ოჯახში მისი ძმა პეტრე, მისი ცოლი.

ამ ხუთსულიან ოჯახს აქვს სახლი, ორდღიური სახნავი საბატონო მიწა, იღებს 20 კოდ პურს, რქოსანი პირუტყვი 5 სული, ხვან-თესვითა და სხვა სამუშაოებით იღებს სარჩოს.

14. პაატა ლომსაძე, მისი ცოლი, ვაჟები: ნინია და გიორგი.

ამ ოთხსულიან ოჯახს აქვს სახლი, ექვსდღიური საბატონო მიწა, ხნავს სამდღიურს, რქოსანი პირუტყვი 5 სული, ხვან-თესვითა და სხვა სამუშაოებით იღებს სარჩოს.

15. გოგია ღონდაძე, მისი ცოლი და ქალიშვილი, მასთან ერთ ოჯახში მისი ძმა გლახა, ბიძაშვილები: პეტრე და სოსია

ამ შვიდსულიან ოჯახს აქვს სახლი, ექვსდღიური საბატონო მიწა, ხნავს სამდღიურს, იღებს 30 კოდ პურს, სავენახე ადგილს შემოსავალი არ მოაქვს, რქოსანი პირუტყვი 4 სული, ხვან -თესვითა და სხვა სამუშაოებით იღებს სარჩოს.

16. იოზ ბაქრაძე, მისი ცოლი, ვაჟი ნინია, ქალიშვილი, მასთან ერთ ოჯახში მისი ვაჟი ნინია, მისი ცოლი, ვაჟები: გიორგი და სოსია, ქალიშვილი, ბიძაშვილი.

ამ ათსულიან ოჯახს აქვს სახლი, ხუთდღიური საგვარეულო მიწა, იღებს 60 კოდ პურს, რქოსანი პირუტყვი 7 სული, 1 ცხენი, ხვან-თესვითა და სხვა სამუშაოებით აქვს სარჩო.

17. ანდრო მათიაშვილი, ქვრივი, მისი ვაჟი ნინია, ქალიშვილი, ძმისწული დათია.

ამ ოთხსულიან ოჯახს აქვს სახლი, საგვარეულო მიწა 12დღიური, ხნავს სამდღიურს, იღებს 30 კოდ პურს, ვენახი ერთდღიური სახნავი, საიდანაც ირებს 6 კოკა ღვინოს, რქოსანი პირუტყვი 3 სული, ხვან-თესვითა და სხვა სამუშაოებით იღებს სარჩოს.

18. იაკობ მათიაშვილი, მისი დედა. ეს ორსულიანი ოჯახი ცხოვრობს სხვის სახლში, აქვს ოთხდღიური საგვარეულო მიწა, ხნავს სამდღიურს, იღებს 30 კოდ პურს, ერთდღიური სახნავი ვენახიდან იღებს 5 კოკა ღვინოს, რქოსანი პირუტყვი 5 სული, ხვან-თესვითა და სხვა სამუშაოებით იღებს სარჩოს.

19. გიორგი ლაგვარაძე(?) მისი ცოლი, ვაჟები: პეტრე, დათია, ივანე.

ამ ოთხსულიან ოჯახს აქვს სახლი, ყავს რქოსანი პირუტყვი 2 სული, მეწისქვილეობით აქვს შემოსავალი.

20. გოგია გიქ(?)ც(?)ოშვილი, მისი ცოლი, ქალიშვილი, მასთან ერთ ოჯახში მისი ძმები: თევდორე და ნინია. ნინიას ცოლი, ვაჟი სოსია.

ამ ხუთსულიან ოჯახს აქვს სახლი, ხნავს სამდღიურ საბატონო მიწას, იღებს 30 კოდ ხორბალს, ყავს რქოსანი პირუტყვი 4 სული, ხვან-თესვითა და სხვა სამუშაოებით იღებს სარჩოს.

21. პაატა კიკნაძე, მისი ცოლი, მასთან ერთ ოჯახში მისი ძმები: ანდრო, თოთა და მარკოზი.

ამ ხუთსულიან ოჯახს აქვს სახლი, ხნავს სამდღიურ საბატონო მიწას, იღებს 30 კოდ ხორბალს, რქოსანი პირუტყვი 2 სული, ხვან-თესვით იღებს სარჩოს.

თავად ივანე დავითის ძე აბაშიძის გლეხები

22. ელიოზ მათიაშვილი, მისი ცოლი, ვაჟები: სიმონი და ზაზა. სიმონს ყავს ცოლი, ვაჟები: იოსები, გრიგოლი და -----, ქალიშვილი.

ამ ცხრასულიან ოჯახს აქვს სახლი, ათდღიური საგვარეულო მიწა, ხნავს ექვსდღიურს, იღებს 60 კოდ ხორბალს, ერთდღიური სახნავი ვენახიდან იღებს 6 კოკა ღვინოს, რქოსანი პირუტყვი 1 სული, ხვან-თესვითა და სხვა სამუშაოებით იღებს სარჩოს.

23. სიმონ ნოზაძე, მასთან ერთ ოჯახში მისი ძმები: დათუა და გლახა, მათ ყავთ დედა.

ამ ოთხსულიან ოჯახს აქვს სახლი, 12დღიური საგვარეულო მიწა, ხნავს სამდღიურს, იღებს 30 კოდ პურს, ხვან-თესვითა და სხვა სამუშაოებით იღებს სარჩოს.

24. პეტრე კიკნაძე, მისი ცოლი, ვაჟი ნინია, მასთან ერთ ოჯახში მისი ძმები: სოსია, დათუნა და გაბრიელი,

ამ ექვსსულიან ოჯახს აქვს სახლი, ათდღიური სახნავი საბატონო მიწა, ხნავს სამდღიურს, იღებს 20 კოდ ხორბალს, დღიური სახნავი ვენახიდან იღებს 3 კოკა ღვინოს, რქოსანი პირუტყვი 1 სული, 1 ცხენი, ხვან - თესვითა და სხვა სამუშაოებით იღებს სარჩოს.

25. თამაზ გოგალაძე, მისი ცოლი, ვაჟები: სესია, ივანე, იობი და ზალიკა, 2 ქალიშვილი(მინაწერი სხვა ხელით-დ.ხ.) ამ რვასულიან ოჯახს აქვს სახლი, ექვსდღიური სახნავი საბატონო მიწა, იღებს 120(?)კოდ პურს, ერთდღიური სახნავი ვენახიდან იღებს 5 კოკა ღვინოს, რქოსანი პირუტყვი 7 სული, ხვან-თესვით იღებს სარჩოს.

26. პეტრე ლომსაძე, მისი ცოლი, ვაჟები: სოსია, ძულია, გიორგი, 2 ქალიშვილი, მასთან ერთ ოჯახში მისი ძმა თამაზი, ბიძაშვილები: გიორგი, დათია, ხვთისია და ნინია, გიორგის ყავს ცოლი.

დალი ხაჩიძე

# სურამში მოკლული ბიზნესმენის ოჯახმა სასტუმრო სრულიად ახალი კონცეფციით ააშენა - როგორ გამოიყურება ობიექტი

სურამში მოკლული ბიზნესმენის ოჯახმა სასტუმრო სრულიად ახალი კონცეფციით უკვე ააშენა. საუბარია, პროექტ „სურამი პალასზე“, რომლის მშენებლობასაც ადგილობრივები იმ მოტივით აპროტესტებდნენ, რომ მათი ინფორმაციით, ინვესტორს ტყის გაჩეხვა სურდა. ამასთან, მშენებლობის მოწინააღმდეგეები ამბობდნენ, რომ აღნიშნული ტერიტორია მეწყერსაშიში ზონაა და მშენებლობის დაწყება არ შეიძლება.

2018 წლის 29 მაისს სწორედ აღნიშნული დაპირისპირება გახდა სასტუმროს ინვესტორის, ბიზნესმენი მამია ბითაძის მკვლელობის მიზეზი. მაშინ არსებული ერთ-ერთი ვერსიით, მკვლელობა სანიადგრე სისტემის



გარშემო კონფლიქტს უკავშირდებოდა, რომლის მოწყობა მშენებლობის დაწყებამდე უნდა მომხდარიყო.

მოგვიანებით, პროექტის განხორციელების უფლება მამია ბითაძის რძალს მიეცა. თუმცა, როგორც ჯულია ანტილოგოვა აცხადებდა, ადგილობრივების ნაწილმა საჩივრების წერა განაგრძო. მისი თქმით, სინამდვილეში საჩივრების ავტორი მოსახლეობის ის ნაწილი იყო, ვისაც საოჯახო ტიპის სასტუმროები აქვს. როგორც პროექტის ხელმძღვანელი ამბობდა, ისინი შიშობდნენ, რომ ახალი სასტუმრო დამსვენებლების



რიცხვს შეუმცირებდათ. ჯულია ანტილოგოვას ინფორმაციით, გასულ წელს, სამხარაულის დასკვნაზე დაყრდნობით, სასამართლომ მიიღო გადაწყვეტილება, რომ პროექტი განხორციელებულიყო, რადგან ობიექტის მშენებლობა საფრთხის შემცველი არ იყო. თუმცა, იქიდან გამომდინარე, რომ კოვიდპანდემია და ამასთან, წარსულის ამბებთან ასოციაცია აღარ ყოფილიყო, პროექტის კონცეფცია მთლიანად შეიცვალა და ახალი სახელწოდებით, რეგულაციებს მორგებული 5 კოტეჯი აშენდა.

„სასტუმრო გავსენით 9 ივლისს. ძალიან კარგად იმუშავა ამ სეზონზე. გექონდა სრული დატვირთვა, იმის მიუხედავად, რომ პანდემიის პირობებში ვიყავით და ბევრი შეზღუდვა, ამასთან, ნაკლები ტურისტი იყო ქვეყ-

ანაში. ამ დროისთვის, მართალია, აღარ არის ისეთი დატვირთვა, მაგრამ ყოველდღიურად გვიკავშირდებიან ჯავშნებს. გვყავს როგორც ადგილობრივი ისე, უცხოელი ვიზიტორები. წელს ძირითადად იყვნენ, დანიიდან, ფინეთიდან, არაბეთიდან, უკრაინიდან, რუსეთიდან.

რაც შეეხება პროექტს, მთლიანად შევცვალეთ კონცეფცია. ეს პირველ რიგში პანდემიის პირობებში გამოიწვია. გადაგხედეთ ჩვენს ხედვას, ის კონკრეტული შენობა-ნაგებობა და ბევრ ადამიანის თავმოყრა აღარ იყო სასურველი. შევცვალეთ პროექტი, შევიტანეთ ახალი განაცხადი, ახალი ბიოლოგიური დასკვნით, რომელიც ისევ სამხარაულის ბიუროს მოვამზადებინეთ, რომ არ ყოფილიყო მოსახლეობასთან პრობლემები და დამატებითი კითხვები. პასუხი მივიღეთ 15 მარტს და იმ დღესვე დაიწყო მშენებლობა“,- აცხადებს ჯულია ანტილოგოვა.



მისი თქმით, ახალი პროექტი მოიცავს ხუთ სკანდინავიური ტიპის კოტეჯს, რომელიც ყველა საჭირო ინვენტარითაა აღჭურვილი.

„ეს არის ეკოლოგიურად სუფთა პროექტი. 5 საცხოვრებელი დიდი კოტეჯი (80 კვ.მ), რომელშიც თავსდება 5 ადამიანი. კოტეჯის კონცეფცია არის სკანდინავიური ტიპის შალე, სამკუთხედი ფორმის. 2 იზოლირებული საძინებელი, სრულიად აღჭურვილი ყველაფრით. ტერიტორია არის დახურული, სადაც 2 აუზია. ეს არის თერმო საცურაო აუზი, რომელითაც სარგებლობა შესაძლებელია ნებისმიერ ამინდში, თოვლი იქნება, წვიმა, თუ მზე. შევცვალეთ სახელწოდებაც, რადგან აღარაფერი მინდოდა მქონოდა საერთო იმ პრობლემურ პერიოდთან. დღეს უკვე გვაქვს „პარკ ჰოტელ სურამი შალე“, რომელსაც ძალიან დიდი გამოხმაურება მოჰყვა ჩვენი დამსვენებლებისგან, იმის მიუხედავად, რომ ამხელა უკმაყოფილება გექონდა ადგილობრივებთან“,- აცხადებს ჯულია ანტილოგოვა.

პროექტის ხელმძღვანელის ინფორმაციით, სულ მალე „პარკ ჰოტელ სურამი შალეს“ რესტორანი და ახალი სერვისები დაემატება. შესაბამისად, სასტუმროში დასაქმებულ 9 ადამიანს, კიდევ 8 დაემატება.

„ჩვენ დავამტკიცეთ, რომ არანაირად არ ვებრძობით არც ბუნებას და არც ადგილობრივებს. არაფერი გავგინადგურებია და გავგინეხია. პირიქით, კვების ობიექტი არ გექონდა და მიმდებარე ობიექტებში ვუშვებდით ხალხს. გარდა ამისა, დავასაქმეთ ხალხი და მე ვთვლი, რომ რეგიონი გამოვაცოცხლეთ“,- აღნიშნავს ჯულია ანტილოგოვა.

რაც შეეხება კოტეჯში დასვენების ღირებულებას, დღე-ღამის ფასი 400-600 ლარს შეადგენს. პროექტის საინვესტიციო ღირებულება კი 1,3 მლნ აშშ დოლარია.

ნინი ქეთელაური



- ხელოვნება -

### ხაშურელი ბავშვების ხელოვნება, ევროპის მასშტაბით, დიდი ასოებით მოინიშნა

ხაშურის სამუსიკო სკოლის წარმატებების შესახებ არაერთხელ აღვნიშნავს ჩვენს გაზეთში. ეს წარმატებები თითქოს კანონზომიერებად იქცა და, ფაქტობრივად, ადგილობრივ თუ საერთაშორისო კონკურსებიდან, როგორც წესი, მუდამ, სულ მინიმუმ, ლაურეატის წოდებით ბრუნდებიან. არც ბოლო



კონკურსი - ფესტივალი ყოფილა გამონაკლისი და ლაურეატის წოდება რას მიქვიან, პირველი ადგილიც (ადგილები) მშვენივრად აიღეს და გამარჯვებაც იზეიმეს. რაოდენ სასიხარულოა, რომ ამ ბავშვებთან ერთად, უდიდეს წარმატებას ჩვენმა ფოლკლორულმა ანსამბლმა „ფრესკამაც“ მიაღწია. როგორ მოხვდნენ ერთი და იგივე ფესტივალზე მოცეკვავეები და მუსიკოსები, ამაზე ქვემოთ.

ისრაელის ქალაქი ცვატი, წელს, მეთერთმეტედ მასპინძლობდა დიდ საერთაშორისო კონკურს-ფესტივალს „ჩრდილოეთის ცისარტყელა“. ეს კონკურსი 2010 წლიდან იღებს



სათავეს და მაშინდელი პირველი ლაურეატებიდან ბევრი ამჟამად ევროპაში ცნობილი მუსიკოსია. მის მასშტაბზე ისიც მეტყველებს, რომ კონკურსში ათეულობით ქვეყანა მონაწილეობს და გამონაკლისი არც წელს ყოფილა: ისრაელი, რუსეთი, გერმანია, პოლონეთი, ინგლისი, უკრაინა, საქართველო, თურქეთი, ლიტვა, დანია... ეს იმ ქვეყნების არასრული ჩამონათვალია, რომლებიც ხაშურელი ბავშვების


კონკურენტები იყვნენ.

კონკურსი-ფესტივალი წელს განსხვავებული ფორმატით ჩატარდა. კოვიდ სიტუაციიდან გამომდინარე, კონკურსანტები ვიდეორთვებით მონაწილეობდნენ ფესტივალში. სხვადასხვა ქვეყნებიდან მოწვეული ჟიურის წევრები კი ადგილზე აფასებდნენ მონაწილეთა ხელოვნებას. „განსხვავებულობას“ ისიც დაემატა, რომ წელს, მუსიკოსებთან ერთად,



კონკურსში ფოლკლორული ანსამბლებიც ჩაერთვნენ.

სამუსიკო სკოლიდან კონკურსში ორი ნომინანტი ჩაერთო - მევიოლინეთა ანსამბლი (ხელმძღვანელი ფატი სადალაშვილი, კონცერტმეისტერი თამაზ აბრამიძე) თხუთმეტი პატარა მუსიკოსის შემადგენლობით და საბა ხუციშვილი ინდივიდუალურად. საბა ჩვენი სამუსიკო სკოლის აღზრდილია და ამჟამად თბილისის



კონსერვატორიის სტუდენტი, გაცვლითი პროგრამით რიგაში იმადლებს ოსტატობას ალტის კლასში. ტრიუმფი - სხვაგვარად ვერც შევაფასებთ ჩვენი ბავშვების გამოსვლას. ჟიურის ერთი წამითაც არ უჭოჭმანია ისე მიანიჭეს ანსამბლსაც და საბასაც პირველი ადგილები. ცალკე თემაა „ფრესკას“ გამოსვლა (ხელმძღვანელები ელიკო და გიორგი რატიანები). გია ყანჩელია და ესპანელი მუსიკოსის ამიგოს ვიცენტის საცეკვაო მუსიკაზე („ლურჯი ზღვა“) შექმნილმა კომპოზიციამ პირდაპირ ადაფრთოვანა ჟიური და პირველი ადგილის ალტერნატივა, უბრალოდ, ადარც განხილულა.

არკადი ბარსტი (ქალაქ ცვატის მერის მოადგილე, ფესტივალის ერთ-ერთი ორგანიზატორი) - „პირდაპირ ადაფრთოვანებული ვარ ქართველი ბავშვებით. ძალიან მინდა, როგორმე ვეწვიოთ ხაშურს, მინდა ვნახო ქალაქი, რომელიც ასეთ ბავშვებს ზრდის. იმედია, მომავალ წელს პანდემიას საბოლოოდ დავამარცხებთ და შესაძლებლობა გვქნება, ეს ბავშვები უშუალოდ სცენაზე ვიხილოთ. ასე, რომ უდიდესი სიამოვნებით გელით მომავალ წელს...“



ვულოცავთ სამუსიკო სკოლას ამ წარმატებას, ვულოცავთ ამ შესანიშნავ პატარა მუსიკოსებსა და მოცეკვავეებს, პედაგოგებს და, რა თქმა უნდა, ვულოცავთ ამ უნიჭიერეს ბავშვებს უდიდეს წარმატებას. იმედია, მომავალში, ისინი კიდევ ბევრჯერ მონიშნავენ ევროპის ხელოვნების რუკაზე ხაშურის სახელს.

მ. გოგოლაძე

### ადგილობრივ თვითმმართველობის არჩევნებში მონაწილე პარტიების საყურადღებოდ!

„საქართველოს საარჩევნო კოდექსის“ და ასევე, საქართველოს კომუნიკაციების ეროვნული კომისიის დადგენილებების (2012 წლის 15 აგვისტო) შესაბამისად, 24 ოქტომბრის ჩათვლით, წინასაარჩევნო აგიტაციისა და წინასაარჩევნო რეკლამის განთავებისთვის, გაზეთში „ხაშურის მოამბე“ გამოყოფილია ფართობი. კერძოდ: ფასიანი რეკლამისათვის გაზეთის მე-4 გვერდი (988კვ.სმ), უფასო რეკლამისათვის კი გაზეთის მე-5 გვერდის ნახევარი (494კვ.სმ.).

ფასიანი რეკლამის შეთხვევაში, ერთი კვადრატული სანტიმეტრის ღირებულება შეადგენს 15 თეთრს (ერთი გვერდი - 148 ლარი).

A3 და A4 ფორმატის ჩანართის შემთხვევაში (თუ ჩანართი გამზადებული სახით მოაქვს დამკვეთს და რედაქცია მხოლოდ ქსელში გავრცელების ვალდებულებას კისრულობს) კვადრატული სანტიმეტრის ფასია 10 თეთრი, ანუ A3 ფორმატის შეთხვევაში- 98 ლარი და 80თეთრი, A4 ფორმატის შემთხვევაში - 49 ლარი და 40 თეთრი.

გაზეთის „ხაშურის მოამბე“ - რედაქცია

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგოლაძე. მისამართი: ხაშური, ტაბიძის ქუჩა №2. ტელეფონი: 24 30 27. E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499. D-ით მონიშნული სტატია იბეჭდება დაკვეთით გაზეთი იბეჭდება თბილისში.